

Huznozganh Haj Saek Comz Caez Gingj Lajmbwn

五彩诺干湖 浓缩天下景

□ Ahlahdanjaulwz raiz Dahdingz hoiz

Daj dieggyae yawj aen Huznozganh.



▲ Dah iq hix gvaunde.



▲ Huznozganh raemx sawdikdik.



▲ Geij dahsau comz naengh guhdoi.



▲ Gyoengq max youq diegnywj henz Huznozganh cwxcaih buet.



▲ Daegmbauq neix gwih max ak lai.

► Bouxhek daeuj daengz caez angqcoux.



▲ Gyoengq max youq diegnywj henz Huznozganh cwxcaih gwn nywj.



▲ Gocoengz ingj youq gyang huzraemx.

Huznozganh diegyouq Nei-mungzguj Huhlunzbeiwj Si Sinhbah-wjhuj Cojgiz Nozganhnozwj Gajcaz baihsaenamz dieg sam goengleix gyaе haenx. Huznozganh, comz gij gingjyawj swhyenz huz, dah, diegnywj, ndoengfaex, diegcumx, bya youq itheij, yungz diegnywj, ndoengfaex, minzcuz, dieghenzguck daengj vwnzva youq dieg ndeu.

Huznozganh, raemx lai dwg gijndei de. Aen huzhung gvangqlangh haenx, raemx sawdikdik, henz miz geijcib aen huziq hopheux. Yungzhaeuj gingjsaek gyaunde diegnywj, dauqdingq ingjok gingjsaek ndoengfaex mwncup, baijok gingjsaek gyaunde diegcumx, baijyienj gingjsaek gyaunde baihaek guekcoj. Huznozganh, nyinh' iemq dwk diegnywj Bah' wjhuj gvangqlangh haenx, ungganq dwk diegnywj Wzvnhgwz cangqcwt hoenghhwd haenx. Gizneix, diegnywj heusausau, cwz yiengz lai raeuh, lumj baenz roix baenz roix naedcaw vanq youq doenghnywj

heusausau nei, dwg gij maqmuengh boux ciengx doenghduz youq henz huz haenx.

Huznozganh baihaek ing Ndoiingh' anhlingj, najdoi diegnywj hung, sam fanh moux ndoengcoengz youq henzgyawj. Huznozganh, saek raemx gingj bya, goekgaen gyaeraez, nyinh' iemq dwk va, nywj, faexgeq, raemxheu song hamq, ciengx le baenz gyoengq cwz yiengz, max ndei, romcomz le hanqmbwn, roegbit, roegyaemyieng, baenz dieg mbanjranz duzbya, aen mbwn duzroeg.

Huznozganh, aen gingq bauj lizsij ndeu, ingjok gij ngauez bing' ak maxcangq Hahsazwj, Cozcizwj gojhanz; youh dwg bouh saw lizsij gwnz diegnywj ndeu, geiqsij le gij cienzgangj hawj vunz haenh Bah' wjhuj, Bulezyadwz, Wzvnhgwz Sojlunzbu; youh dwg mbaw gvanghdez lai cungj lai yiengh ndeu, gaekloeg gij vwnzva minzcuz, dwknyaen, ciengx bya, langhciengx lai cungj lai yiengh. Huznozganh,

dieg ndei minzcuz, comz le haujlai fungsug. Diegnywj gvangqlangh, miz daegmbauq Bah' wjhuj cangqcwt; huzraemx unqswnh, ingjok gij cingz dahsau Bulezyadwz; ndoengfaex caemrwd, hamz miz gij cezcou diuqfoux dwknyaen gyoengq bouxsai Wzvnhgwz. Langhbaiz gij yiengh vwnzva diegnywj, vwnzva ndoengfaex, vwnzva ciengx bya, vwnzva dwknyaen lai yiengh ronghsag, cauxok le fuk veh minzcuz fungsug daegbied gagmiz Huznozganh.

Huznozganh haj saek, comz caez gingj lajmbwn, mbehai fuk veh bak leix, fubfab seizcoz caeuq rengzhoengh, sengmingh caeuq gikcingz. Diuz dah sawdikdik lae coco, huzraemx bingzbwdbwd ingj raen aen ronghndwen, ndoengfaex gocoengz mwncumcum, diegnywj gvangqlangh gyaе gyanggyang, diegcumx caemrwd. Huznozganh ajhai aenrungj angqcoux gyoengq bouxhek, naj riunyumnyum deq gyoengq bouxhek daeujdaengz.